

四庫全書

集部

欽定四庫全書

集部

錢塘集卷三

四

詳校官庶吉士_臣馬履泰

檢討_臣何思鈞覆勘

總校官檢討_臣何思鈞

校對官編修_臣楊壽楠

謄錄監生_臣葉立笙

欽定四庫全書

錢塘集卷三

宋 韋驥 撰

戲別顏令

趣馭不遑辭地主
趣晴唯且荷天公
縣樓歸去勞東望
早就新篇寄好風

將及熟溪

東風吹散黑雲輕
漸望吾疆野色青
料得熟溪灘響急

到時聊為駐軒聽

邛落

輕寒切切戰春陽
村落人家意自遑
老婦畫眉窺止水
癡兒曝背坐頽牆
牛歸小徑蹄痕疊
犬吠空山響荅長
夏賦未來秋賦了
片時優佚勝膏梁

途中寄縣齋諸士子

花發蒙亭畫景舒
浩歌應嘆食無魚
靈岩恨不同真賞
且把新詩慰子居

離石室

九十陽春興已酬
登山穿谷盡清幽
閒田不是無多讓
故遣塵勞作勝遊

離邑寄顏長道

縣城不出已逾月
出愛秀野浮青春
前時枯株變深翠
對我意氣如欣欣
肩輿漸入南康道
溪山清曠交吾鄰
簿書撥置固可喜
又况雅誼還相親

聞詔士呈同僚朱伯英

聖神慮遺士豪俊思致身詔書一飛傳上下交歡忻吾
儕職山邑步局志未伸緬想風雲會廓然忘我勤

和亭

前賢重交際世俗競將迎用禮皆由正知和始可行候
亭增舊構題榜易先名訓激非存遠還當鑒鄙情

和伯英初霽

日出乾坤靜陰霖革累旬前溪聲未減綠野秀如新人
意猶祛病物心疑再春此情誰解賦先手屬東鄰

和顏令見寄

孤城四面插羣峯雲翳經旬雨氣雄自愧不才為縣尹
近來無事若山翁幾思羽翼飛騰去幸有英豪咫尺中
獨上高樓方引脰喜逢嘉句載清風

洗出郊原物象明積陰祛盡喜天晴東鄰長道詩新寄
增我溪山一倍清

權東陽既久求歸武川上守倅

章守

劇邑虛官偶承乏字民何術慰林林文翁化被雖無事
巫馬才慙懼不任樽俎弗踰宗祝計牛羊自守秉田心
願歸山邑逃瘴曠養拙寒儒荷賜深

沈倅

星火州符氣勢豪敢辭承乏賦賢勞設施每恐無能及
曠責還憂不可逃捕鼠孰淹希驥足解牛難任割雞刀
願令檮散歸閒邑更使潛心緣飾高

衢梁試院呈同事

秋風動林葉山國早寒輕較藝精神暇持杯語論清勿
辭淹鎖院未用尅歸程留意如求舉終當不誤評

依前韻酬張屯田和詩

落筆流星緩疇言白璧輕鄙辭翻可媿老格有餘清擇
士無精鑒糊名況舊程更煩為大句使我壯文評

試士畢同長道東歸

相將冒曉出郊原但值佳山即駐軒投午未行三十里
和詩已及半千言黃雲被野田禾熟白雪飜空溪浪奔

高曠襟懷共為樂此情難與俗人論

上睦州劉工部

政行荆楚百蠻懷却擁旌旄向此来自喜平生無枉道
豈論千里復淹才思蘇疲瘵精神返威懾姦慝膽氣摧
秋晚子陵溪上好樽罍風雅許誰陪

桐廬古郡壓烏龍瀟洒佳名信不空傲世曾栖隱君子
謫官多屬鉅賢公連雲城郭殘秋外近水樓臺返照中
太守公餘登覽勝始知天意養其衷

和朱尉見招

作尉由來本仙局況能投隙會僚朋開懷自遣人須美
治具雖疎客不憎雨意初收天爽快田工將畢歲豐登
高吟大飲無羞澁祇恐秋風苦不勝

和顏令見寄

別後經宵各到家別時岐路兩縈斜相期卮酒重何日
獨對秋林浪有花攻墨卻思同整具擇金猶記共澄沙
語言髣髴如朝暮但悵睽離似海涯

觀穡

霜風卷葉度高樓樓上蕭然對晚秋
坐看野人收穡稂
相將盡室在田疇
赴晴汲汲如防寇
望歲區區已見酬
遺種多忘歌笑去
乃心應亦傲輕裘

寄長道

詩筒寂寞過殘秋
望斷前山暮靄收
共簡猶思石岩句
連鑣悔失爛柯遊
晴溪激淺聲還細
栖鳥爭深閑未休
野興與君當不異
不知今日在層樓

縣齋即事

比來遲訟少，拙令稱幽潛。
愛日開朝幌，看雲捲畫簾。
澄神烹茗粥，憶古檢書籤。
菽水清多樂，溪山意自恬。
韜光異耕釣，苦志念漁鹽。
驥足空思展，牛刀敢謂淹。
民心久當信，佐局美相兼。
笑傲言祛隘，賡酬韻闕嚴。
囊錢如未乏，樽酒尚能添。
園笋新成綠，池荷半露尖。
共謀懷坦坦，毋卹遠炎炎。
此興歡無敵，逢人語必箝。

永康徐尉次寄，顏令詩韻見寄，因以前韻酬答。

柅車為別始中秋遽見霜朝愛景浮自愧馬期無少暇
祇應梅福有清遊殷勤好句能相寄哦咏幽齋豈便休
此段情懷何所似月明更上庾公樓

和朱伯英後圃見招

愛君邀客以清詩會我公遑詬訟稀
岑白到時須自勉
亂紅飛處是春歸

初夏公餘

公遑日無事民伍正蠶耕
夏淺寒猶在雲濃雨易成
圖

書存遠古詩酒有餘情傲吏居幽僻其誰誚近名

和朱伯英迓送還示

憐君連蹇從初仕慰我蕭條典一同莫為塵勞便興歎
所施無負即為功

和太守郡閣望羣山有雪

郊原霽後晚寒清殘雪籠山望處明盡道凝留因地冷
當知粉飾藉天成崑岡玉聚微雲歛滄海潮橫返照輕
解賦屬誰詩格老賢侯登覽在層城

自郡還寄長道

故歲跼重城填然思不清歸來見春老何處慰詩情顧
我幾茅塞知君已帙盈社壇當未廢舊約可尋盟

和顏長道見寄

宛轉溪山邑落深春歸雲物易成陰鶯穿別塢遺新子
花謝前村失舊林自厭簿書為滯迹未應軒冕足關心
東鄰幸有顏明府清曠襟懷且共吟

謝朱伯英遺詩

我輩清懷善自將不須才與古人當佳辰美景無窮盡
險語高詞亦轉相隱更未能離擾擾詩情猶得慰皇皇
如君逸格誰忘羨驤褭終難困服箱

和顏長道寄三首

首夏

秀色發叢萱清陰泛新竹園林足幽思陽陽曲池曲奚
獨念春歸愛此未炎燠

縣齋肆筆

簿領區區宣愜情塵紛安得眼長青且希五柳先生醉
莫似清江使者靈臨政每慙非善治隨時尤愧闕

誰能與我同幽曠隴上耦耕還帶經

閱武川倡酬

往還賡唱百餘篇草草編聯後或前語氣有時凌夜月
詞源何啻瀉春泉須知吏隱能遺俗不獨山棲解樂天
屈指代期秋信逼封人莫厭屢馳牋

掃蒙亭

蕪亭一掃媿陳蕃
松柏陰森翠竹環
開烟盡毆澄曲水
橫柯旋斫望青山
人歸畎畝醇風在我近
圖書白日閒
檇散自知成獨樂
慚無善效及民間

次韻和顏令見寄

再來東白日無休
剗剗唯憂或滯留
滿眼煙塵真可厭
幸而涵碧見清秋

伯瞻郎中生日

瑞氣飄飄貫斗牛
當時貽慶在南州
太平勢盛高賢出

造化功成萬物秋
侯國幾年凝課最
相門今日足風流
祝公壽與靈椿等
庶得留中盡壯猶

中秋南康夜會得天字

宿陰初卷盡萬狀
正蕭然夜色兼秋
半人情愛月圓禡
巾灑濁酒露坐幕
青天佳節還相遇
陽陽憶去年

假道南康長道語
今夕中秋正故歲
聚并喜樂時也
遂留以夜飲飲半
和所示詩

月華乘顥氣人競
此宵明舊會嗟經
歲修途為輟程涼

飄襟袖爽秋入管絃清莫誚紅裙飲新詩亦間成

睦州千峯榭二首

千峰圍繞自蒼然古榭淒涼不記年搜索舊名逢雅尚
主張佳境有豪篇坐凌翠靄羣鷺隔眼入清秋萬狀全
蕪廢不唯興此地當知民物盡陶甄

層基突兀倚晴空碧嶂回環勢複重秀色有時侵畫隼
蒼煙盡日臥烏龍嚴公灘近增幽槩方叟詩存得舊蹤
賢守葺遺殊衆好政閒把酒看千峯

宿廣嚴靖閣

久為簿領廢登臨一宿禪局萬慮沉
半夜松聲驚夢枕
琴書幡起故園心

過法寧僧舍

積陰卷盡見朝陽更入雲林古道場
踈曠襟懷終久在
暫離簿領已清狂

題虎峯真師壁

虎踞山形路屈盤烟雲過盡到禪關
老僧得地真安穩

不向人間趣往還

檢覆雞啼源還虎峯

到此崎嶇力已疲
肩輿西去更乘危
始知不及閒人好
避險從安任所之

寒雨夜會得歌字

佳客來相遇
銜杯語論和
夜寒兼雨甚
酒色向人多
淚燭搖紅萼
風帷動翠波
漏聲催舉白
簷溜混微歌
朋契談間合
詩鋒闇裏磨
十年方一笑
不醉奈情何

呈范子鎮同年

白日當時共得仙清樽未倒且留連
間關益部君今去後會輕論又幾年

勸元功飲

昔時同閑令同郡氣義相懽此最親
莫向酒杯成偃蹇醉來詩格合清新

再和范同年得廳字

人生難計擬并合若漂萍稀濶同年會
蕭條古縣廳冒

寒欺雨勢卜夜託龜靈漏轉歌聲促風餘燭燼零主樽
慙北海容量過滄溟願且留車馬離絃未可聽

涵碧池

原泉有本養淵渟更似端人見底清竹色山光朝暮在
當知涵碧不虛名

涵碧亭

座隅平地是雲山爽氣無窮六月寒夢得祇知圖未善
不知能畫不能完

瀑泉

堂堂一道出山腰色似垂縑響似潮何必枕流圖洗耳
坐觀已覺俗塵消

雙石魚

誰磨紫石作雙魚繞以清流泛酒觚祇使幽人添醉逸
山林未快憶江湖

傲亭

嵯然危構冠山巔以傲名亭傲可賢不與世人論是否

誰能來此臥雲煙

雙峰

我愛雙峰若竝趨
鈞然蒼翠傲榮枯
定應天意成真槩
磊落相依道不孤

擊甌

簫鼓厭喧逐甌聲
可薦杯鳴珂秋獵
駿鏘佩曉朝迴挹
注雖為助甄陶別
有胚玉纖敲擊銳
驚起玉山頽

和朱尉示親老生日

鵬殘朝夕是新春秀入溪山碧萬尋白髮親逢蓬矢慶
綵衣人奉玉杯深風迴遶絃簧宛日上簾旌插珥森
敢謂小官無足懟盡懽菽水亦甘任

和朱伯英元夕

燃燈結綵學春山佳節還逢邑事閒僚佐相從真我侶
旄覲共樂在其間月中風味當無比醉裏塵勞似不關
祇以清罇期漏盡明朝應悔主才慳

席間和向闢之元夜

令節伸眉且自寬與民同樂是民官宴酣豈為殘更促
醉兀何妨萬目觀舞袖飄飄凌夜月燈山閃閃戰春寒
孤城誰謂蕭疎甚無愧途人即可懽

無愧塗人即可歡

原闕

月華瑩澈通春夕

民氣融和却暮寒
拮據餽蔬成曲會
扶携老稚任環觀
邑農他日逢今日
往往應能話舊官

回長道中論

原闕

紛吾子文章有本根
此說獨能通正

原

闕

專門剖開先聖難明旨羞殺拘儒既

原闕

才何足議但憑餘焰發冥昏

和長道候使者宿龍窟見寄

原闕

幽寺傍

原闕

昂藏頂翠螺縣尹候迎車蹕

闕

田屯觀

原闕

潭間水黑應龍臥松表風清獨鶴過

原闕

我蕭齋倚柱祇長歌

寄

原闕

長道將罷邑借前韻以寄

山

原闕

對春風把酒螺况是安屯囂訟少

何

原闕

懷多眼看野色煙雲秀指數瓜期日月過

聞說

原闕

將解印追攀無計且酣歌

和見貽

拘攣山邑四

原闕

滯徒嗟薄宦身憶昨同時來視事

羨君先我作閒

原闕

心雖記多佳議寒齒還憂失舊鄰

安得追攀如素約舳艫銜尾倚江濱

送章郎中赴闕

原闕

治已成還臺榮望本崢嶸朝廷不許淹賢

原

闕

借守情曉日旌旗動行色春風笳鼓作

原闕

闕城西道祇恐朱轡欲迅征

原闕

孰可儔弟兄麾節占三州疲甿救盡方為

原

闕

還豈自由仁似周侯小崇在清嫌漢守大

原闕

應靜夜雙溪月遠挂公心未得休

探得海棠送章仲成

高低海棠枝交結離人思離披海棠花爛熳離人醉醉

來離思輕看花

闕

有情一片隨春風悠悠逐君行

和長道交道釋見招同趨府

北出城闌

原闕

明待驅款段趨君行歸時亦欲偕吟醉

寄語

原闕

落英

同長道遊惠僧翠樾堂

覃覃潔宇

闕

城阿車馬知名始見過邃密莫嫌春態淺

牢籠不闕

翠陰多玩心爽槩真偏得泯迹空山去幾何

今日

原闕

褫帶暫將塵擾就消磨

清明雨

陰雲散漫與山平
草暗花昏匝古城
定是天心惡遊放
故將雨脚鎖清明
誰知靜圃無窮趣
獨有幽禽不住鳴
况值清明歸去客
共樽談笑有餘情

四月一日西池作

原闕

荷葉大如錢
拙令無功又一年
六月京塵傳流

原

闕
嫌池上更遷延

和朱尉首夏偶書見寄

踰蹬瓜期失山城
獨滯留馳驅更萬態
寒暑過三周底

裏繇前固隄崖懶外修僅能違吐茹豈謂足陽秋所幸
偷安佚茲心在討求門闌方事隙園落見春休秀色孤
花載晴光隘葉浮池魚行有隊林鳥語多羞蘆笋青簪
密丁香翠幄稠藏身啖野繭露角笑蝸牛遮擁芭蕉扇
墻披薜荔裘清風如遠俗危坐自忘憂目極山兼水雲
飛越與甌官曹雖鞅掌野興易牽鈎銛絕侵疆訟閤無
覆刺投優閒為佐局邂逅得吾流酒薄猶思共詩成罔
不酬肺懷非異致議論詎相矛受代何辭晚謀懽且自

由他時遂睽阻徒爾念英遊

遊金柱觀瀑泉

源高雲表許誰窮飛出岩前百丈雄豈是山神作靈恠
鮮將煙雨變晴空

和伯英再賦

原闕

隱恠少人知非是山僧別有機漏泄一朝逢地

原

闕

終不似前稀

同朱尉遊普寧僧舍

訟庭無事出南城來扣禪關萬慮平強作優閒羞宓子
自成清淡愛梅生綦敲玉局林鶯竄詩落苔牋山鬼驚
却說去年違此約老僧應解管宮營

和初夏雨中

瞥然春去浹旬餘積雨乘陰氣節殊曠野石泉飛白練
虛遶簷溜激明珠繭因寒晚羣情病麥候晴收萬室須
空解登樓伺雲色愛民拙令愧偷儒

端午雨飲伯英池館

山城重午遭陰晦謝氏池亭亦自堪野色映來歌舞好
炎威消去酒餚甘手中菖屑隨杯泛頭上榴花帶雨簷
且盡主人留客興明年誰北復誰南

送王學士赴京東漕

重寄屬名卿除書拜寵榮山東移使節天上動星明經
畫幾三載恩威盡列城詢求皆疾苦課入自豐盈酣宴
咍無取焦心憫未宏孟陽鳧已愧劉晏譽還輕報國曾
襟壯紆民術學精休風鼓羣吏高論滿諸生豈敢身干

進難排翼傳聲褒功形聖詔易地近王京捧檄將新命
遮車見衆誠拳拳思遠託冉冉即修程電閃旌旗活雲
收鼓吹清山川開爽氣草木有餘情行健途疑促吟豪
思欲傾越吳釣慕戀齊魯樂奔迎萬里宣材力中朝倚
辦營僉諧猶有待輿議豈能平噐尚虛兼濟謀終贊仰
成宸衷方外藉安可憶登瀛

曉出候按察

未曉驅車出炎蒸畏日高蒼茫侵霧氣隱約聽雞號流

滯還尸祿奔馳敢嘆勞苦吟隨處有未始廢陶陶

自和

將旦雲天慘前瞻使旆高田翁持火走山鳥向人號自
哂折腰久誰憐負弩勞解從歸去樂空愧不如陶

偶作

紗巾疎爽葛衣寬簿領無多笑傲間黃卷仰持眠畫榻
白雲斜歛見晴山風荷瀉露池聲激煙柳藏蟬野趣閒
日月淹留非不幸柅車休嘆未西還

予莅製濟民藥朱尉掌糶常平粟因以記

火日炎炎五月天邑中分事力相完君當庾廩司平糶
我近方書輯衆丹共識朝廷欲為惠豈圖居處自偷安
誰言忠誼須謀大未合謀時且恪官

和新竹

根本堅深豈費培龍蛇盡見天材斜穿似愛幽人到
踈列還容小徑開涼月驟添新影密清風不減舊枝來
歲窮自有凌霜節寧比秋衰惡草萊

和獨釣

蒼葭欺綠髻白水照朱顏
擲餌淵渟處牽鈎蕩漾間
亦知魚吻沫肯學雀銜環
且欲資清曠消磨永日閒

古人多隱釣意不在微求
稽海曾垂幣磻溪舊直鈎
聲名當日晦德業後來收
莫笑臨流者持竿迹更幽

送劉睦州移京西漕

賢傑恬榮進朝廷
睠舊材優閒輟為郡
按舉復行臺憶
昨巡荆北于時會
歲舊轉輸憂國計
假易緩民財吏議

烏能避邦條不可裁謫遷知咎戾忠信即基胎解印離
江許分麾泝浙洄列城遺厚愛千里沛餘才火玉堅難
變霜松翠弗摧壯行心所勇膠祿素嘗吟履道期終固
謀身絕外猜子文忘愠色嚴助樂歸來撫俗專求瘼提
綱獨整頽察幽窮蒂芥屏惡自渠魁犴獄春多草賓階
雨不苔溪山圍几席風月侑樽罍毫瘦清吟苦絃高雅
曲哀黃堂成臥治青律再飛灰況味安符竹曾襟傲面
槐桐廬聲績遠冀陞寵光催近部勞經畫兼資藉瑋瑰

使旌蜺旆矯宸詔鳳毳毼肅肅途將戒元元慕若孩車
攀朝輶軸舟適夜張桅被命恭雖益封章懇以推讓庶
儀組紱貪冒慙驚駘京輔非輕寄天衷未易迴功名當
盛獲蘊蓄豈空培輿論靳皆愜高懷願更恢壯猷那久
抑早晚詠良哉

雙蓮二首

池間鞞鞢紅特爾不雷同共本青跼瘦駢頭秀色充湘
娥心並恨江女珮雙空忍負流觴樂虛教逐暮風

臨風皆獨媚同蒂忽相親擢秀材宜合飄香勢自鈞雖
慙兩岐瑞已掩百花春定是憐濡滯殷勤悅主人

和朱伯英以詩慶將代

非材安敢嘆淹留吏外尤忻共雅游欲代雖知歸去樂
相看還動解携愁襟期豈逐炎涼變談笑應隨簿領休
來歲黃花何處好懷思把盞對霜秋

再和

區區邑落四逢秋敢詫歸期占上游似得葵丘瓜代信

如銷都護玉關愁
琴彈夜月聲還變
詩寫溪山興未休
幸有臺池且同醉
別離到後更何由

將歸

代期漸可數
光陰掉鞅歸時秋已深
籬菊正牽元亮眼
江鱸還動季鷹心
迎新送故人徒擾興
利除殘我不任
唯有溪山不辜爾
未嘗曠日廢清吟

效謝宣城體呈同事

秋風鼓長松聲來何颼颼
衆鳥相與還山椒
落景收吏

冗得所隙笑傲偕優游雖無杯中物亦足忘余憂

呈孫東美

睦州
試院

露氣侵簾幕蕭然夜已分
括囊停較藝倚几重論文
邂逅成相際從容慰所聞
溪船行各去回首只秋雲

試罷

杳杳紛袍去寥寥鎖院中
雲收晴野曠潮卷夜江空
難盡文章鑒終輸議論公
敢辭淹旦暮歸翼尚羈籠

和東美示內樂亭詩

養恬真有得
逐俗固無心
月沼秋如鑑
風松夜當琴
公餘偏坐晚
客至不談今
張我名亭意
慙君寄好音

和東美見寄

子陵溪上各危檣
心逐君歸到故鄉
回首蒼茫空鶴望
亂山縈繞似羊腸
評文酷愛曾襟遠
坐邑還憂事業荒
忽得新篇開鄙塞
甚于灘水決沙囊

釣愛亭

簿領支離每競辰
退思當亦在吾民
抑扶為術如偏取

字養存心固一均杖履數來消逕蘚笙歌久闕聚梁塵
天公豈復遺踈拙風月隨時不負人

內樂亭

誰謂茲亭浪得名寥寥氣象副深誠地饒松竹千年色
天與雲山四合清靖節固嘗為傲吏子真元不勢名卿
伊余竊慕恬然樂肯以紛華戰性情

凌翠閣

凌翠閣翠光寒不落公事餘閒日日來簷前好鳥無驚

作

凌翠閣突兀撐寥廓
滿眼蒼煙萬里春
忍負十分金鑿落

凌翠閣四面祛櫺箔
千里無雲看月明
何必庾家樓上樂

凌翠閣山繞如城郭
風味都侔陶令居
所慙猶被青綸縛

木芙蓉詞

木芙蓉牆頭淺淺紅
秋林枝葉十九空
獨此唯扈當秋風
秋風無意開俗眼
俗眼不開須在儂
接羅斜歌勿嫌重
滿簪何卹驚兒童
豈必黃金菊難辜
白玉鐘

國哀

天地有大故
朝廷凶訃來
五年再罹苦
臣民若為哀
鉅賢荷遺託
夢澤滂九垓
衣冠又新命
收淚心悠哉

離鄉

不走京塵已十年
治任西去興悠然
功名欲立非人致

才宦未伸還自憐路柳得春多意思野禽批水共連翩
孤舟獨載無人語唯把空書攷聖賢

過千金懷陸剛叔許顧道

記得當年泛小舟相將隨計冒殘秋故人笑語無緣合
今日煙波獨此由老木戰風春尚淺斷雲籠日雨方收
自惟我輩襟期在碌碌誰甘便白頭

平望阻風

大風嗥空聲烈烈小舸逆牽饒飢孰交跼擁鼻坐其中

蚤暮恍然難以別利名無絕人自縈山林無局人自絕
區區冷官何足賴奔走勤勞可嗟咄

題周開祖叢翠軒

所居知所向種竹接前欄翠色無時減清風引日添蕭
疎共談麈輝映祇書籤碌碌夏畦病輸君此養恬

汴上遇孫楚材

春陰蔽日多飄風二月凜冽猶窮冬馭夫凌兢踏泥凍
旅况索莫填心胸淑人邂逅獲交馬語言浹洽欣相從

夜投孤驛共清飲安得復訴瑠璃鍾

再和所酬

萋弘滅跡已綿久誰于二月為隆冬相逢詩酒得賢侶
遽使炎燠生吾胸飲酣真趣不可壞詩狂險韻皆能從
殷勤鄙句復叩激自喜牙琴還遇鍾

早行

曉雞三唱已戒馭復長郊殘雪籠河岸初陽射柳梢野
人猶閉戶宿鳥或依巢而我何為者區區足自嘲

宿零壁驛

淒寒動春夕覆被益重袍鄉夢驚還遠征途久覺勞破
牕留月影古木任風號聞戒無兵餽剛腸獨佩刀

予枕屏書叔夜養生論而孫楚材觀之有詩相示
遂次來韻以答

枕外霜屏手自書數千微指慰焦枯乘時豈羨鵬飛海
悖理須譏馬守閭治氣養心予所慕長生久視古非無
喜君與我同茲好免蠹當終學戶樞

和黃彥文示詩

執經今日再相從，快若鴻毛翼疾風。
持已已憐仍舊好，力文還喜後來充。
平蹊安肯容茅塞，美玉寧辭以石礱。
顧我空空常考擊，愧無術學似河東。

岩齋曉起

曉起郊原寂，清風盥櫛傍松梢。
泣微露，岩頂泛初陽。
髣髴山禽語，飄零古殿香。
携書寓蹊拙，三伏化寒涼。

寄陳安道

同年同第復同門計治同為待次人一紀清時共濡滯
兩身孤宦各艱辛不要鐘鼎須耕道未遂山林為食貧
吾黨襟期當自信且隨天意養輪囷

又和所示

布鼓微聲強自信兩篇響答語驚人連城自我忻懷寶
八字憑誰歎受辛豈為儻來輕有動但能恬守即安貧
相期厚養忘多欲莫似豚蹄祝滿囷

七夕

此夕流傳久不磨相逢樽酒且酣歌竿垂阮服終成強
腹曬隆書顧幾何漫道銀潢能限隔未聞河鼓畏風波
樓間安用穿針乞世上紛紛巧已多

七夕寄安道

去年此夕我拘官君挾魚軒到此安自爾分馳數千里
豈圖今日一交懽風萍離合光陰速月桂交遊契分完
不倒玉壺終未已待將河漢夜深看

附郭照鄰舟還鄉一首

國門迴首氣葱葱拜了君恩去意濃故里華舟幸同載
鄰邦嘉士喜相從高談浹洽情無畛新句縱橫筆有鋒
往往旁人多羨慕主人況是郭林宗

送郭照鄰赴南雄簽幕

淺汴縈迴減迅流綠榆踈薄弄殘秋蘭舟去指三千里
梅嶺前頭第一州幕府久須賢者畫朝廷最重遠民憂
近來選擢多超邁竚聽君才不次酬

汴舟早行二首

隱約短窓明嘔啞兩櫓聲曉寒衾外覺鄉夢枕中驚心
喜親闈近身從宦路輕男兒棺未蓋安可嘆虛生

容足豈無處浮名浪自牽通宵不安寢湍水正鳴船旅
況情何賴家音遠未傳凌晨飛棹急聊以慰遷延

延和引對

昔年便殿拜恩光今日重來慘肺腸螭陛載瞻新侍從
龍顏如仰舊君王星霜一紀逡巡過膏澤三朝次第當
埃壒尚能裨泰嶽豈無忠誼報明昌

至泗即天長獨歸叙別照鄰

長淮十月北風高判袂臨津首屢搔
草草旅裝方攬轡
勤勤別酒更持螯
扁舟君去良多况間道子歸豈憚勞
行矣餘杭期會在早來江上看寒濤

再回前韻

畫船東下櫓聲高閃見旁舟墮玉搔
張翰歸心鱸滿箸
畢公狂興蟹雙螯
朝食餽釘唯論飽夜語訴諧豈厭勞
乍聚乍離當不恠夫君多可似山濤

無脚橋

汴上

杳鑿關連壯橫空不可搖激波無鴈齒跨岸只虹腰改
制千年取傾舟衆患消乘輿濟人者為惠固相遼

離泗上

曉霧鎖長淮初陽熨未開造舟行險滑舁竹勢遲徊迥
野蒼茫合巖風浩蕩來歸耕如有地勞苦曷為哉

避雨大明寺

去時驟雨忽兼風歇馬曾留此寺中今日來歸復如此

始知事有偶然同

和簡夫遊鼓山

氣肅乾坤萬物秋，久違真槩喜重遊。
高閒況奉挂冠樂，曠逸慚非蠟屐流。
狂飲何羞吹帽落，時鮮豈必置船頭。
鵬搏鷁集逍遙等，醉眼冥冥百事休。

申園席上口占

涼秋池館燕閒身，密席榮驩主與賓。
白日神仙分兩勝，青雲兄弟占三人。
東籬瀟洒黃花好，北海風流綠酒醇。

投轄更須防壞坐夜深共醉月精神

和李信臣遊南岩

秋雲杳杳鎖秋岩
恠木森森蔭碧潭
遊騎去時平檻曉
老僧迎處滿衣嵐
何人自塑臨泓水
近古遺棺礧石龕
我憶昔年曾此醉
却嗟今日輟陪參

答信臣遺詩以失南岩約

閒裏縈愁不自由
馳心空想碧岩秋
連鑣獨遠朱蹄駿
釃酒還辜綠螳浮
嗟我數年遺覽歷
屬君一尺更遲留

定知清興難窮盡莫便輕迴訪戴舟

和南岩迴

心舒還愛日境勝欲忘歸茶戰弱一水蒸兵尚十圍秋
山終易冷暮坐只添衣上馬迴回首數霜蟾逐蓋飛

簡夫丈約遊南岩時以婦翁室會遂渝爽依韻和
其來篇

巨源常少恠第五豈無私酒食先為困溪山輒負期七
年思舊賞隔日誦新詩康樂清遊在隨軒別有時

和信臣遊簡夫太丞申園

洞門流水地仙家
棄祿歸來餌曉霞
不比鍾山多怨語
未饒金谷足名花
風絃靜舞千齡鶴
夜枕閒聽一部蛙
此樂人間無覓處
只應天畔有靈槎

又和

一門清訓黃金賤
三葉榮名翠琰題
楊雀語言先世得
荀龍頭角後來齊
聯姻君喜重交好
高閑予慚早獨躋
試聽野人歌盛事
滿床牙笏當公圭

和簡夫送信臣同年次韻

龍鳳當年共力攀，參辰異迹十年間。
相逢邂逅身為客，叙別躊躇色動顏。
北冀馬羣先駿逸，南山豹隱舊文斑。
而今百里還淹止，行聽佳聲似魯山。

廬陵待試士呈伯升郎中

重門晝鎖碧梧陰，秋氣凌虛日向深。
耳目甦清拋吏局，情懷終樂近書林。
安排一月拘攣計，酬酢千人進取心。
未勝試期饒暇逸，倚鐔尤喜聽高吟。

中秋夜

人間此節號佳辰
鎖宿文場意自伸
雨脚洒開秋氣象
雲頭放出月精神
坐無紅袖何妨樂
殘有芳醪不計巡
數句願歌今夕事
主人才力似陽春

贈別伯升

士林佳譽久飛揚
脫迹初筵本異常
盡道清朝隱方朔
不知白髮困馮唐
古今議論千端勝
南北風情萬里長
乍會乍離勞景向
萍江樓上獨相望

又和來篇

貢闈將畢意揚揚
日夕炎涼亦未嘗
幾聽秋聲廢高枕
屢乘月色坐中唐
雲牋寫句慙非敵
玉塵揮談服所長
款段匪朝歸冷僻
未知何以慰鄰望

陪吉守范淳元觀玉虛觀靈芝席上口占

廬陵盛事照明昌
浩蕩西風八月涼
賓履共隨紅旆去
仙宮新報紫芝芳
成非雨露寧無感
出近星辰別有祥
誰謂古書難盡信
眼看珍異答龔黃

寄題吉州三瑞堂

珍祥疊疊遺廬陵
芝秀蓮雙瑞露清
天意獨偏三物應
人心胥慶一堂成
壁間篇詠辭多實
席上樽罍勢自榮
早晚璽書褒治行
潁川遺美為銷聲

送章少卿赴闕

老成風迹藹中朝
威惠南邊久已勞
三節召歸方汲汲
列城懷戀尚嗷嗷
郊原雨止車塵少
霄漢雲空旆影高
太上定嗟相見晚
佇聞秋覲拜恩褒

和龔簿同辨金劍源

兩源溪水弄清音百丈山峰削翠琳
不顧衣冠當赤日共看沙磧辨黃金
自緣世態嫌遺利豈是吾儕枉用心
却憶去年并會樂相逢又得叙離襟

劉仲誠以武夷記見借

自從見借武夷編每一開編思渺然
使我胸懷厭塵滓羨君家世樂神仙
漫亭曾會千餘客石洞元居十六天
何日訪靈尋翠壁待將名字謾彫鐫

寄上高宰孫世則

鄉間遊處景醇全忽忽光陰二十年官局舊嗟蹤迹遠
封人今喜信音傳才驅繁劇君應易事奪清閒我獨然
畏簡未能成會合且持詩句寫拳拳

道中寄景升仲誠二同官

兩道幾千里殘炎七月天累囚念濡滯匹馬重遷延夜
宿荆榛際朝行虎豹前幡思竹軒好擁事亦神仙

巴陵訊囚所居附岳陽樓前

雙扉盡鎖夜傳呼
訊鞠勞心迹也拘
祇有清虛慰懷抱
開軒即是洞庭湖

洞庭湖上岳陽樓
舊走聲名徧九州
今日偶來猶吏事
幸當風月近中秋

洞庭秋四首

洞庭秋旦好餘霧
尚懷山日色一竿
際波光萬頃間宿
商鳴櫓去夜網得
魚還佳趣知多少
濡毫恨思慳

洞庭秋晝永氣象
坐中分浩蕩三江水
蒼茫萬里雲君

山壓波面民舍傍城根自昔看圖畫今焉過所聞

洞庭秋薄暮日脚返滄溟雲氣天涯赤峯巒水上青歸
舟來隱隱夕鳥去冥冥鼓瑟音何在空聞帝子靈

洞庭秋夕爽皎月瑩長空顚氣重湖接清光四望通樓
開雲母扇人在水晶宮勝絕無窮景蕭條萬古同

寄示二小子

學自辛勤富名從曠怠休癡慵迴爾意扞格慰吾憂股
刺難須著鄰光豈用偷當知漢唐世家緒有公侯

洞庭即事

日車閃閃下山椒
風陣蕭蕭掠柳條
湖上晚秋天氣爽
樓間極目客魂銷
湘妃哀怨馮誰聽
楚屈英靈何處招
竊祿無田歸未得
浪吟當此愧漁樵

浪頭卷白去無垠
山面鋪青一色勻
氣象清雄無處比
情懷踴促此中伸
歌危釣艇唯堪望
倉猝商帆不用嗔
顧我遽來非自任
也知牽制為官身

君山

洞庭波上崢高峰翠色難將別岫同真籍從來標福地
大鈞于此費神功蛟龍拗怒深深避星月流光面面通
塵迹未能乘興往據鞍回首正秋風

岳陽樓

岳陽樓句舊空傳今日登臨一慨然不是洪鈞有偏黨
豈容勝概獨完全山川形勢三千里基構聲華五百年
襟帶西南太平世收羅風月屬私權

晚起

落月光微暝靄收一軒瀟灑旅懷幽湘君山外波濤曉
麋子城邊草木秋俗吏區區情易倦古人皦皦志空求
且希月廩從官給仰事孤親潔膳羞

閱金科

得情猶勿喜聖訓所宜欽取正存三尺持平在一心撫
文唯恨密麗罪莫求深豈必于虞革源流定可尋

和朱伯英新州詩見寄二首

武川當日一分襟會合乖期向武林從此參辰不相比

由來歲月漸加深書郵遠道煩新寄詩社前盟約再尋
何以報君雙白壁南樓高處獨縈心

吏冗拘人好思慳憐君遠遠發昏頑梅花嶺外題詩寄
萍實江邊繼韻還數幅密緘迢遞去寸誠都寫別離間
翻思舊日賡酬樂鼓譟當時更有顏

送潘簿還侍下

四見霜花始解官綵衣還侍肯盤桓胸中事業仍加益
篋裏經書不廢看立馬仙山風帽側移舟秀水露帆寒

銓衡論奏恩輝近早寄佳聲遺我懽

送周廣之令桂陽

猶餘殘雪凝山椒已見新春上柳條
引領不能成面別寄詩空欲減魂消
為言民社遷官重莫嘆湖湘去路遙
早向縣廷舒所學如君風迹定翹翹

安遠道中

晚穿亂水踏欹危曉度空山瘴霧飛
今日戒途甘險阻古來謀事重依違
行詢野叟觀其欲靜究州圖記所非

走徧封疆收定議黃花時節合東歸

金精岩

回岩萬仞透青暝造化功偏竅鑿精自是神仙乘福地
豈因謾詐誘愚兵金牀舊迹知何在石鼓遺歌僅可評
塵泐慙來心已悟靈場千古為蒼生

遊金精迴書朝陽岩觀壁

秋入羣峰氣象清朝陽才過到金精勝遊却向塵勞得
此日情懷慰此行

板石驛

童山皆戴石淺水屢縈村路接猿猱險雲兼瘴霧昏披
榛投舍館藉草展行樽吏役身無定天涯一斷菟

中秋午夜和溪看月

去歲中秋別岳陽洞庭湖外望清光今年衮衮仍行役
此日蕭蕭復異鄉林葉泛輝兼玉露水波搖影接銀潢
出船聊踞胡床坐遠負高樓列酒觴

登鬱孤臺

區區倦翼傍旌旄獨上名臺滯思逃章水背流餘派合
崆山前隱獨峯高萬家井落氛埃絕千里喉襟氣象豪
一見荆川勝侯印况將佳趣慰塵勞

去年秋宿洞庭湖今日登臨在鬱孤兩處風流皆勝絕
一身奔走亦崎嶇光搖二水看雲斷翠滴千山愛日晡
吏役不容清興足放船回首望城隅

過贛石

乘危趨疾固輕身却羨操舟妙入神石罅安船石頭立

漁人謾笑往來人

天柱灘

密密巔灘三百里此灘崛起最崢嶸中原柱石知多少
安用江心濫得名

九月八日離虔

明日重陽日章江獨放船豈無時節興固有簡書牽殘
暑猶爭際餘雷忽霈然詰朝晴氣爽忍負菊花天

九月八日薄晚離贛城十餘里而雷雨作遂倚舟

卷三
以宿九日曉行又十餘里而逆風暴甚乃泊于
白鵝灘側度之史君相留不可屢以亟行見謔
今日會賓席間當語及濡滯以為笑矣因書以
自戲云

佳辰來可喜久客去難論為憶東籬菊因辭北海樽
逆風吹急浪單舸泊孤邨緬想茱萸宴盧胡有後言

至萬安

西風蕭瑟作秋聲遠客歸心信水程雙石尖尖雙鷺立

一灘渺渺一舟行酒杯無侶難成飲
詩句非奇謾寫情
晚泊沙頭從杖履故鄉何在眼空明

和孫世則著作新年見寄

不奉清譚一紀餘相期情分愈于初
數篇秀句鋒誰敵
累幅華牋手自書芸省聯曹雖喜共
萍江製邑獨慙疎
如君才術當超卓安見飛黃困守閭

剗繁芟弊力無餘行學存心負厥初
凍筆方驅囂訟牒
解頤忽得故人書分襟固久情還密
領邑雖鄰迹也疎

安得同時俱代去相從山水樂吾間

行年

行年四十志方剛一任蓬鬆兩鬢蒼道在忽愁施設地
心恬寧惑利名場本無畎畝為私計只有詩書可自強
努力終非素餐輩未堪回首顧滄浪

宿新樂驛

去秋村北宿僧床今夕村南寓驛堂官僕頗諳蹊逕熟
野人應笑往來忙敝裘不耐春寒甚老馬猶堪山路長

獨酌獨吟還獨寐此中清況亦難忘

之度推劾道遠雨甚念從隸之勞

山雨淋頭急岡泥沒骭深從驅爾何罪行役我甘心柳
鞵憂難趂分裝恐不任蘇樵復稀遇寒氣少相侵

安福驛

作邑多離邑去家如去鄉三年三過驛一別一迴腸治
績安能勝征途迺脩嘗何時腰解印長嘯入餘杭

喜晴

今年未見日指數兩經旬清旦初開霽元功始布新溪
流徐變綠林轉便知春吏役方長道油雲莫更嗔

南昌鐵柱

南昌昔謂水浮州鐵柱持持事更幽天地有鑪勞一鑄
蛟螭無穴解羣憂槎牙露處幾三尺搖撼徒然踣萬牛
人賴旌陽恩力大此功何愧禹功優

寒食

春來二十日寒氣尚稜稜萬甲殊未拆新雷徒已曾山

禽鳴瑟縮道馬足凌兢節候無驚異江南舊所稱

贛州鞠効呈同事鄧宰德夫

二月春寒倍覺深雙扉盡鎖栢庭陰修途遠至勞雖甚
雅誼相親喜不任窮數須繫額用智哀矜當亦共存心
累囚未引猶紓暇濁酒那辭細細斟

次韻和同時到院

各沿臺檄會平番萍水金谿隔萬山兩處相期仗官驛
一時交際到江關如何遠趾符同甚豈是誠心膺合間

案牘牽仍母易視因情未得莫優閒

鎖院深寂天桃獨芳有可憐之色為詩要德夫共

賦以賞之

靜院深局霽雨新小桃牆側弄精神只知春色歸吾眼
不悟他鄉寄此身露蕊妖韶真自得胭脂濃淡屬誰勻
共將短句酬幽艷奚獨東風是主人

二月十六日感雨示同事

燭燼遺朝几爐烟出畫簾時春驚一半山雨悵相兼吏

局如巢寄家音以鵲占敢思遊觀樂同患滯囚淹

錢塘集卷三

欽定四庫全書

錢塘集卷四

宋 韋驥 撰

訊鞠有間呈德夫

同時鎖深院輪日直寒廳所得期無喜忘情在不經桃
心隨雨碎柳眼向人青早晚連鑣去春郊約罄瓶
案積雲堆影庭虛谷應聲撈筈非所事杖履有餘清靜
逕牽情數芳林照眼明相逢得佳侶尤足慰營營

次韻德夫推院有感

薄宦予嗟少定蹤賢勞君歎久西東相從山國春多雨
共憶公園花已叢酒約倒杯忻有伴詩尋險韻懼無功
勤乘閒隙酬清興便與分襟擢短篷

惜春

皦皦春陽上柳尖輕輕朝霧亦相兼教雛老雀穿雕拱
失伴狂蜂入翠簾深院難將飛絮鎖空階且任落花黏
惜春情味從來甚今日江城興倍添

二月已破三月來吟詩空憶少陵才
簷前有意殘花墮
雲裏無情旅鴈迴何處輪蹄蹂芳草
誰家絲管上高臺
吾儕局外添嬰繞此段襟懷強自開

次韻社日且以善謔

社日江南眼屢經春天嶠北寄春城
雙飛海鷺知時節
半醉田翁舞太平謾把杯盤為小飲
頻催案牘況垂成
却思廡割東方朔歸遺那無動旅情

復假前韻為即事二詩且言別于卒章

煙花冉冉裏江亭，雲靄紛紛接暮城。
物態除非詩可寫，旅懷唯藉酒能平。
燕知社節來何早，鶯怯春寒語未成。
非晚與君分袂去，他時當記此時情。

浩如潮水出東溟，勇似雲梯破鐵城。
談麈交揮逾月久，吟毫相抗幾時平。
清驩返向塵勞得，佳集元非計搆成。
還守邑疆相望遠，隴煙江月若為情。

上巳日贛川憶東湖

湖在宜春

韶光強半已消除，嶠北芳華眼不辜。
黃鳥穿林金閃鑠，

紫荆鋪地錦模糊持循畏簡催胥吏整頓歸鞍戒僕夫
傳語東風為加意少留花卉在東湖

曉風吹雨過溪南春色晴光三月三燕觜啄泥方汲汲
杏梢欹水正酣酣樽庖冷落俱能耐刀筆縈仍豈自甘
珠閣簾堂應好在待教門外繫歸驂

再用前韻為感春喜會二首酬德夫

五侯門館映交衢點檢春光肯暫辜教舞庭除紅錦藉
看花牖牖碧紗糊侈心忘理雖兒女樂事乘時亦丈夫

而我拘攣過佳節豈無船在賀家湖

感春

東風爛漫巨江南林薄餘花十二三
隱隱游絲飛日影娟娟戲蝶舞春酣
獨旗共愛茶芽嫩佳境俱憐芋蔗甘
談屑不宜虛永晝長歧分背謾停驂

春杪書懷三十韻呈同事鄧令

覆因將訖事春杪興蹉跎亭館依游好
雲天氣候和江山秀色遠桃李綠陰多
燕熟巢仍補鶯新語尚訛逕深

無過轍門閒可張羅雨漬苔錢積風旋柳絮渦落花衝
蟻陣側葉露蜂窠朝霧開如埽晴絲蕩若梭鳴禽多了
了舞蝶並傚傚物意良俱得人情亦自阿軒窓資坐嘯
杖履起行歌屋角鸞飛翼簾旌動翠波畫圖連壁帶香
穗接庭蘿筆穎牽詩癖茶槍戰睡魔清談屢揮麈酣飲
必空螺語射憐當鵠論書憶換鵝九霄明日月萬國富
山河輕減中原役韜藏絕塞戈壯猶攄濶畧崇論闢公
麼束帛丘園走封軺驛傳過拔才方迅疾養拙且婆娑

鳬鶴形難壹鷗鵬好自頗痔醫榮足賤墻乞詐宜訶投
步安夷坦存心謝揣摩勢窮嗟屈賈道樂慕淵軻豹隱
潛加澤牛山戒執柯忘非羞搏虎招議畏鳴鼉末官難
縈束高懷固岌我踏青筵已曠鑷白鏡慵磨聊作逍遙
詠君其謂我何

次韻和鄧德夫再和書懷別用三十韻

飛文侔羽檄執議有金科于役同之賴夫君僅自鄱相
逢多所樂末禮去其苛魚詠蒸然罩材忻茂者莪窮姦

推狡穴辨枉愈綿痾日食餽幾變宵憂寐欲叱恤寬防
夏旱驅害逐春儼覈實當由已指蹤奚自他囚衣應足
蟲吏案已勝駝居似蛇存蟄歸如繭化蛾險途須屢叱
行旅勿輕呵白雪風中絮青錢水上荷佳辰憐爽曠秀
句好彫瑳束卷儒風舊嚴裝武貌番分歧茲泮渙回首
則猗那蟻酒慵為酌藜羹糝不齏輕遺逸士帽倒踏謫
仙靴恍忽東西驛躊躇上下坡嚶鳴忻得侶妖豔况方
瘡引脰鄰于鶴離腸迴若沱版徒猶相武筆吏解封鄮

易失時兼勢難淹軸與邁莘耕方釋耒磻釣亦收蓑勉
力攀翔鳳何心躍遁騾養軀宜氣適乘興且顏酖淡泊
延詩伯吟嘯遠舞娥加功草封岱著意弔沉羅即是金
扉對無辭墨綬拖似違臨晚擇聲問約新禾何日瞻天
馭同聽白玉珂

紫荊花

紫豔暮春庭少陵詩思清老蛟蟠曲幹丹礦綴繁英花
譜元無品春工別有情不隨桃李色俗眼莫相輕

寄元真州

春陰蕩盡見春妍立馬長坡思渺然望斷雙旌已難見
聲聞五袴只空傳遙知裁劇常虛刃應賞風光蚤布筵
不省玉人歌闕處紅梅多少落樽前

荆林道中示孫張二君

西風掠雨作朝寒聯馬相將入亂山愧從使車無補助
敢辭征馭歷間關日邊帝闕瞻猶遠雲下親闈念未還
旅思紛紛何以慰間求佳論一開顏

再用前韻和孫正甫所示

畫船同出汴渠灣
天末雲收數點山
共應辟書離魏闕
誰持別酒唱陽關
間論浙右經年事
此去膠東幾日還
男子有為須遠趾
誰能轅下久低顏

膠水道中逢九日呈溫伯舍人

繡衣奉使出東州
九日旌軒不暫留
固有誠心當倚注
肯緣佳節廢詢求
馬蹄遠踐天涯路
鴈翼橫飛海角秋
安得一樽黃菊酒
代公冰飲過宵休

再用前韻謝和詩二首

雖知自古有言酬倍獲佳篇却重留襲璞固宜資一笑
報瑤何意足多求詞源浩若江河注筆力成如造化秋
詢度餘閒吟詠作豈非夫子德公休

九月十八夜宿萊州海廟夜分登亭望月觀海呈
伯溫舍人

晝從旌旗過碧山夜陪巾履望漫漫蛟龍睡著風波靜
鴻鴈影低星月寒不極清光分島嶼無邊爽氣接欄干

此時此興真夷曠莫作閒遊一等看

出東萊城示海傍觀者

老稚相携出翳林玉沙堤上聽車音便安赤子朝廷意
補助清時使者心畎畝均休無一役歲時賑乏有千金
東人只見東溟濶不識君恩似海深

再和孫正甫音字韻呈舍人

峩峩氣格冠書林落落文章叩玉音
暫別諫垣虛謹論
聊持使節慰焦心紅塵翠靄飄衣繡
紫幅黃油護印金

采盡輿情將入告謀謨誰得見精深

九月二十二日黃縣道中遇雪

九日登州路西風暴作威黃桑猶半在白雪已交飛
慣見邦人眼難當旅客衣來思尚稽詠遽此對霏霏

將至登州

長途冉冉馬蕭蕭風勢橫來帶雪飄鴈隊去成鐸
甯陣螳螂行向劍頭挑氣清肝膈詩還健寒切肌膚
酒易消顧我不才無寸補徒瞻使騎旆旌搖

聞潮

錢塘江上吾家近，慣聽秋潮動地鳴。
今日蓬萊千役處，却疑身在故鄉行。

和淮陽顏長道見寄

冉冉征途似夢間，相從未幾又先還。
却思前日同清會，不若當年醉碧山。
別去載懷眉宇舊，書來重說髩毛斑。
吾儕固有襟期遠，肯向明時容易閒。

登蓬萊閣

行盡東州到此州登臨更盡北山頭孤城突兀連滄海
三島參差聳暮秋廣座下疑黿負石危簷遠學蜃為樓
蓬萊方丈雖冥邈高閣今朝亦勝遊

和孫正甫二首

馬頭今日向西行不比來時道路生與子聯鑣下長坂
無人回首望高城疎林積葉牛閒卧衰草牽風兔自驚
詩思過于歸思好征鴻斜襯落霞明

馬頭今日向西行僕馭欣欣脚力生白雪波濤離海國

黃金宮闕想京城牆間笑語羣兒集木末衝飛獨鳥驚
從此歸程宜倍道解鞍須到衆星明

路疑

曉起仍行邁征途一夢新鴈低如有信馬急似無塵青
訝山長雨黃疑柳自春此身從袞袞奔走豈由人
莫夜仍投宿郵亭葺半新風帷如漲海煙幕似征塵白
訝牕催曉紅疑爐變春歸期尚淹晚鞅絆可尤人

遊齊州靈岩四首

征塵洶洶頓消磨路入靈岩好趣多崖穴透空疑畫月
泉池凝淥似春波錦帷香細薰千佛金殿燈明覺衆魔
一宿禪房幸安穩明朝騎馬又長坡

東國名高獨此岩羣峰環抱自韜鈴道場岑寂規風古
禪室空疎杖喝嚴木落有時飄殿角雲寒終日蔽山尖
不知雙鶴歸何處留得靈泉與衆甜

區區不覺路岐難塵土衣冠喜動顏已見成書歸上國
更逢便道覽名山隨軒幸涉三時久弭節仍陪半日閒

却與禪翁自相悅繡衣雲步共追攀

雞鳴峯外日曛曛欲去躊躇興未窮索筆請題青石柱
留名願附碧紗籠重裘迴觸千山霧迴轡輕隨一徑風
跋馬頻頻望蒼翠他時應與夢魂通

再和顏長道見寄

行役牽攀好思慳詩筒句浹未能還驅馳東國黃塵路
夢想南鄉碧玉山顧我俗情方滾滾愛君佳句獨班班
再吟再和都緘寄幸有冥鴻羽翼閒

小雪後牡丹號朝天紅者開于縣宅西圃

西林枯枿著繁霜一品仙葩獨自芳
天意似教驚世俗歲寒方信屬花王
才迎曉日仍添色不得春風也倍香
修竹茂松應內愧後凋從此是尋常

八月二十四日州牡丹

八月西風動地來枯株衰卉慘池臺
如何春色花王品獨對霜威御史開
冷艷自然欺竹栢清香足以薦樽壘
豈非千里寬羸俗召得陽和暗裏迴

寄橙與孫叔康

金包磊落冒朝陽，輝映秋林氣焰長。
帶露摘來盈翠籠，披雲擎去薦黃堂。
野芹謾欲分微意，盃菊應嫌奪異香。
沙上木奴還可貢，題書須待洞庭霜。

按水旱之災將畢呈叔康太守

使符星火急騎馬徧郊原，水旱生靈瘁朝廷。
惠澤存縱橫來履畝，高下必分村訢牒。
秋雲積批毫墨電奔，豈無憂歲計何敢隘。
君恩不許胥徒效，寧從僕馭繁恐驚民。

室困愁蹤路塵飜縣令非能此邦侯預戒言流離烏忍
去愷悌莫輕論輒代疲屯手為詩謝戟門

喜潘通甫迴郡

傳道前騶入郡城白狼山外一馳情談鋒睽遠踰三月
使指間關涉幾程我獨賢勞肯嗟嘆國之武備藉經營
公餘未省詩多少願借滄浪許濯纓

和潘通甫芍藥十韻

衆卉已蕭索朱欄始盛開尚先秋後菊肯羨臘前梅秀

出絲頭軟紅深膾縷堆踈明憐點纈巧麗愛重臺倍得
花神力偏當吏部才雨枝成墮髻風葉自扶腮彩筆真
難寫金刀未易裁狂香晴轉暴醒態曉方迴議品須推
貴論功鄙接栽仙宮疑髣髴安得不徘徊

暑雨言懷和潘倅十八韻

暑雨應時至年來民氣和池塘假灩澦畎畝小溲沲跼
縮栖梁鷺淋浪貼水荷一番新滌垢何處不盈科旦市
猶無跡寒門愈可羅庭柯均見濯簷溜獨成波獵子愁

收戈田翁喜荷蓑蜂衙忘刻候蛙吹恣吟哦篋恨書生
蠹場憂麥化蛾涼風颭以度清興迴然多公退書帷寂
詩餘道服拖雖非倖擊玉僅可比鳴鼉屢促低絃軫頻
傾濁酒螺自存惟浩氣兼養類菁莪衣葛踈仍補羹藜
淡不齷百飮舒足力六字習心呵未有焚魚興寧為扣
角歌茲辰拜高詠適足慰蹉跎

和孫叔康九日三首

樓壓西城埤堦重使君才思浩無窮芳樽泛出陶潛菊

健筆吟成老杜風
西座一時飛大白
雙旌盡晚卷深紅
自憐遠跡違高會
九月篇章亦幸同

使旆登高拂曉來
賢賓道舊喜追陪
東籬黃菊因時盛
北海清樽趣節開
簾幕雲收見洲渚
笙簫風引下樓臺
新詩侑酒窮佳興
不惜當筵恥執壘

區區冷色度涼秋
不得乘時奉勝遊
九日杯觴雖獨遠
一番珠玉幸兼收
紫萸隨分浮金盞
明月還能照荻洲
欲寫蕭條才思拙
臨牋尤愧乏銀鈎

和潘通甫芍藥

牡丹謝後覺荒涼
此艷中興百步香
莫誚雕欄當晚節
須知名卉絕羣芳
金刀剪處雲霞破
翠籠擎來錦繡裝
別乘殷勤華府宴
應將花譜議前王

和叔康侍親遊琅山

晚揚紅旆出郊關
畫奉安輿上碧山
野色蒼茫雲色外
嵐光飛動水光間
行庖薦饌烹金鼎
荷劍挑鐔結玉環
歸路邦人瞻慶侍
銀龜朱紱照酡顏

五十如嬰孝慕難公餘綵服侍登山回頭民社千閭密
引望鄉關一水間暫奉清遊臨佛界都將塵事付莊環
憑誰盡與東州看刺史何如閑與顏

和孫叔康以詩寄芋

清淳一闕聽塤簫磊落堆盤享芋鴟拙令此時心飲足
慙忘野外有民飢

琅山聽竇山人琴

秋深危閣氣淒清來聽先生促軫聲一曲寫成君子操

七絃傳盡古人情
游雲簷外如將合
幽鳥枝間不敢鳴
未省琴心在何處
高山流水對前楹

又和孫太守琅山席上

薄霧輕籠曉日黃
攀從旌旆到禪坊
坐憐古木榮枯慣
仰笑秋雲聚散忙
酒約覆盆分甲乙
詩成擊鉢互宮商
興酣猶恨嚴闌逼
少促歸鞭趁月光

和潘通甫六月十二夜月

去望猶三夕
光華宛矣同
炎天幾及半
午夜喜當中
爽

氣乾坤滿清輝宇宙通
恍瞻銀界白遽失火雲紅
庭葉霜花泛池波雪色融
閭閻消烈暑寥廓散輕風
快若離深甌飄然出大籠
秋毫歸一鑒宿翳却千重
誰弄桓伊笛徒思范蠡蓬
魁杓俄轉北箕尾漸回東
林靜踈瑤圃橋虛臥玉虹
餘涼入幽室暗霧泣深叢
緯象光仍小銀河派自洪
依稀太清境髣髴廣寒宮
鳥宿羣疑定人閒萬慮空
調琴閒對客酌酒旋呼童
莫語身兼世休論萍與蓬
且來明月下舉白聽梧桐

送潘通甫泐牒淮東

火雲焰焰野無風，淺澁河流小舸通。
尺紙遽傳朝命下，翌朝齊送使旌東。
道間覽物應多感，職外成詩寓幾筒。
王事念深忘畏景，賢勞安肯動宵中。

和通甫見贈二首

幾年持養副天成，造次云為必中程。
樂內何希儻來貴，畏知唯有白絲清。
蓬瀛尚欠文章手，寰海徒傳學行聲。
今日詩筒互酬唱，他時回記豈忘情。

肝胆區區豈足矜搏風寧復計鵬程未能名迹如山重
且喜心誠似水清學譬治蛙猶失溉文參擊缶不成聲
感君篇貺虛褒借強扶蓁蕪寫鄙情

和通甫道中先寄

神明不爽久躋跼一望旌軒舊觀旋殘臆光陰江海上
新春消息柳梅間傾風固喜同披霧竊祿仍羞似抱關
更奉詩筒先寄貺解頤高句動蒼顏

和通甫同登慶和寺閣

佛宮樓閣倚雲端
人世塵埃杳不干
萬里海光生目眩
半天風勢切肌寒
老僧指境依稀辨
往客題名次第看
一奉勝遊承健句
詩魔暗裏為摧肝

和潘通甫寄孫太守

五馬傳呼盡避驄
二車行縣海壖東
歌聲被筦騰新曲
酒盞垂蓮學倒蓬
迴馭望仙雙旆晚
戒程餘慶一帆風
拘攣不得陪供帳
只許區區鄙句通

和潘通甫陳貼海道中作

飛空恨乏王喬舄擁弊幾如晏子裘興利略行田際港
冒寒仍上海邊樓草埋古迹存荒壘雲漏陽光見遠洲
不獨區區祇吏役又隨軒旆作清遊

寄孫叔康

歲華垂改月猶圓寒夜長思一歛然從政謾圖行幼學
濟民何術禦凶年消憂姑酌賢人酒託德唯瞻刺史天
安得居諸如過隙早看薏麥被原田

寄鄧舍人二首

頃隨旌旆按東州一別門闌物再秋
內誦德言如在耳
仰瞻雲步但昂頭掖垣遙想絲綸暇
海角方深賑卹憂
安得此身如泛梗區區能傍濟川舟

白髮書生意氣完確然行學效民官
九天宮闕心長在
萬里江河分亦安
屢愧姓名塵薦牘
豈論明類必彈冠
感公知遇如何報
唯有霜筠敵歲寒

廷評慶壽口號

納慶新春八十年更逢誕日一開筵
童顏鶴髮人間貴

道服烏巾地上仙
玉盞輝輝擎壽酒
金爐冉冉泛香煙
暫停絃管聽祈頌
願見恩書歷九遷

乙卯十二月十四日夜宿東禪僧舍

簿書雖是不離身
一宿精廬興味真
莫道後欄花未拆
夜來霜月豈慚春

又題僧壁即事

天地收功固欲全
朝廷恩惠豈容偏
飢羸大衆粟不足
縣令胡顏入俸錢

和潘通甫中春即事

雜花交錯裹樓臺二月向殘三月來塵跡遇時隨分樂
酒樽逢景等閒開幽禽有意名相喚飛絮無情舞自回
遊覽莫為頻數厭逡巡便舉送春杯

和李春初牡丹花

逸欄矜賞日千迴賦詠慚無卓犖才天意似嫌羣卉雜
花王留在曉春開曾經唐苑聲歌後不是隋園剪綵來
安用繁言警耽惑愛奇能有幾人裁

暮春對景書懷

一番新雨洗樓臺何處紅芳不爛開
春色漸隨流水去薰風還入弄琴來
梁巢戢戢鳴雛鷺林葉陰陰覆老梅
遇景乘時須自適江頭每到日西迴

和晚春雨霽

油雲卷盡曉天明風色融和日色輕
著處餘花知有命一番綿雨喜初晴
園林經潤春難老庭館無塵氣轉清
誰道東君忘所屬此時於物特垂情

和落花

春風幾日為催開，却趁春風委翠苔。
莫訝花王留不住，本緣真宰儻然來。
暗隨蝶夢飄書榻，半逐鶯聲落吹臺。
綠葉依依猶可愛，吟腸終日為縈迴。

和木香花

架竹引繁英，青羅簇素瓊。
潛卑寶相色，遠過瑞香清。
被雨凝雲重，因風舞雪輕。
憑誰變花譜，陞在最高名。

和以雙頭牡丹贈叔康太守

盈盈仙蕊忽雙開似把輕羅一樣裁綠蒂相扶真艷出
芳心齊送異香來浪吟莫惜詩千首爛賞何妨酒百盃
剪寄黃堂有餘愛也應蝶夢不空迴

和登琅山為民祈福

佛宮突兀枕琅山金碧樓臺詰曲欄霽雨願收田潦積
盛陽祈變麥秋寒紅旌冉冉來何肅赤子林林意自寬
早晚豐登應精懇行看展報上層巒

和書懷

朴拙從來附會疎恬然養內肯求無自憐結髮遭平世
不愧孤踪在坦途一意固當知趣舍百錢寧復問榮枯
鐘鳴鼎食非吾動所得須論象罔珠

和晚晴書事

圓荷貼水翠錢稀風掠餘花片片飛細雨有情容易歇
青春無繫等閒歸樓頭晚鼓牽聲遠海上雲山亂點微
坐喜民田見豐兆幅巾談笑對殘暉

和孫叔康探梅二十八韻

鴈過春將近江梅想已苞逢時在南國探信出東郊徑
雪晴初埽河水薄易敲尋香望林隙驚素辨山坳躍馬
迴賓鴈飛旗懾蜡猫初芳得消息喜氣自并包豈待鶯
聲促寧憂蝶足跑先容為桃李脫迹遠蕭茅此日花神
睠他年驛使說前騶傳已的後乘聽猶聲獨被陽功早
奚論地勢硤新葩同衆閱秀句仗誰抄湛湛塵纓濯纖
纖痒背抓金絲纔出蒼珠琲遍攢梢攀折誠難忍將承
亦旋教重疑仙界種復過歲寒交瑩潔䟽情竇精神動

目窅貪幽頻倚杖薄晚倦迴鞘有酒安辭醕無魚孰嘆
庖輕裘忘擁腋短髮任垂髻坐不娛歌舞盤非貴烙炮
量尊鍾與鼎噐隘斗兼筭勇作先春計甘從逐物嘲瓊
英行漸盛玲賞莫輕拋次第筭家釀隨宜饌野肴投閒
集簪履盡日卷旌旂隴笛終當起塗歌或載呶空枝徒
取恨片片若為膠

和觀雪二十韻

紛紛隨朔吹及物任洪纖足以稱為瑞踈哉比撒鹽朝

飛收羽翼夜象晦鈎鈴農望先知喜童心豈易厭對疑
銀界色啖勝露華甜寸隙期皆徧微埃迴不兼豪筵賓
酒壯遠塞虜兵殲長坂愁羈旅空山困隱潛塵懷經歲
撓清興此時添已變瓊鋪砌還驚絮撲簾扁舟誰念戴
采筆自追淹野思生猶淺詩情雅若爛凝眸萬頃白引
袖六花尖和寡思琴操賢高憶酒帘江潮雲蓋水樓閣
玉粧簷折竹驚寒雀衰葭擁暮鷄冷官饒寂寞僻邑養
安恬坐患凶年久行憂癘氣漸探深評尺咫均慶及閭

閤仰特賢侯德無勞太史占

和叔康席上

兩麾相遇百花春
煙海漫漫共此垠
席上笑談成秀句
一番傳詠樂邦人

海上風光入暮春
使軒輕過古城垠
琴臺此去猶千里
已有先聲慰昔人

哭路長吉

器業本青雲
泥涂竟屈身
蓋棺窮海角
還葬大江濱
子

幼令無怙家清正苦貧傳聞動歸旄西望一沾巾

和潘通甫願齋書事

簿領羈拘日少休江山清興未能酬
琴希弄綠誰咎陶柳不栽還自謀
謾道庸庸多後福豈甘泛泛祇隨流
高軒一過塵襟爽旋折堂萱記酒籌

和中夏清虛堂

碧玉闌干白石除虛堂瀟灑聚書圖
窓明晝可窺蚊睫簷靜時聞噪雀雛
涼吹東南生砌竹繁陰朝夕在庭梧

主人襟量清如水此段幽佳稱得無

中夏偶成

地交淮浙屬通川官守區區改歲年
鑒照自驚生鬢雪感時還聽噪林蟬
鍾鳴鼎食何為動鶴引熊經似有緣
內樂無窮奚卹外便便休誚孝先眠

和凌霄花

翠蔓緣株上紅芳冒暑開凌霄誠有謂託質豈無媒

和餘慶道中

荒涼古邑近東溟時喜軒車出按行水鳥逆風如有向
晚霓收雨似多情心採畎澮豐年兆目極雲沙遠思生
佳句更從清曠得肯由塵事汨聰明

和孫叔康中秋寄運判胡秘丞

郡堞危樓夜氣清江光海色接天平涼秋一半無邊爽
皓月十分何太明使者星軺行蹇遠令君兵釀恨徒傾
自憐負弩區區迹却向澄霄望旆旌

又借韻寄太守叔康

城近江山夕靄澄樓開欄檻與山平秋光正似鴻溝判
月影圓如白壁明詩壓東陽臺上句酒晞北海座中傾
荒墟拙令方匏繫引脰西風盡隼旌

和太守叔康以詩答桃

鈴閣揮毫寫浩才雲牋艷艷發松煤桃投愧匪千年種
瑤報榮誇十襲開目送武陵佳實去耳聽清廟雅音來
不龜獻藥嘗封地未似芹誠致贈瑰

又借前韻謝惠茶

靈芽產自越岩隈精製須調焙下煤隱士寄題絨且密
使君分惠重其開點疑白雪盈甌泛歎恐清風兩腋來
却和短章酬雅贖畫幔何以謝瓊瑰

寄橘柚

海門橘柚勝湖湘采獻鈴齋有意將舊歲空希杜陵句
今年方報董涇霜敢私磊落充賓豆願貢甘香佐壽觴
蘊蒸可羞誠所致厥包況是重維揚

送王聖途得代還青社

坐櫻簾領久紛紛鮮印終更興味新
盡室圖書離海角
一船風雪渡淮濱
家山遠認雲門曉
里社行看孟宅春
術學似君須得路
早教馬足踏京塵

孫太守席賦催粧

蘿蔓新懽可重誇
葭莩舊契轉增華
閨門素守先生訓
牢鬻來歸御史家
直戶三星乘節候
迎車百兩減浮奢
鵲橋深夜飛霜冷
早對菱花整髻花

和孫叔康寄示上元

聞說邦人慶上元使君同樂具賓筵朱幡不得陪清賞
明月空能共此圓和氣暗隨香穗散微風輕送燭花偏
謾將鄙句追高會已負當時白玉船

和雪三十韻

密雪連空散同雲蓋野繁朝暉掩羲馭暮象蔽天垠皦
皦漫長陌霏霏集短垣杉松蒼翠奪禽鳥語聲吞病症
樵斤斂尋蹤獵騎奔金莖迷沆瀣銀界變崑崙光借寒
儒牖威消貴冑門酤帘表深巷爨屋露幽村可嚮紅爐

燼難忘醖酒樽竹梢低欲折梅萼重猶存沒谷吟當楚
離江咏去袁高才題不盡妙曲寫仍翻旅鴈宵飛戢栖
雞曉舌捫塞巖添玉壘林迴化瓊園遠岸舟藏鷁高樓
瓦匿鴛鴦秋濤千浪疊夜甲萬軍屯綴若凝酥潔堆如琢
虎蹲脂車休旅傳鏘佩放天閣不以多為瑞誰言即也
溫神鋒剪何利地軸卷無痕暗與春工敵清隨朔吹噴
朽株銀作葉圓沼壁為盆照耀偏宜月侵陵只有萱藩
籬白羽揮略約素虬蜿蜒汀鷺難求侶城烏不辨昏流年

垂改籥危坐祇銷魂自視豐和兆心窮造化元紛紛雷
動植渺渺助乾坤屏翳殊強力滋枯獨養原芸然知矣
否雨露未成恩

又和倒韻

匿疵真有德值物不偏恩細或穿幽隙悠然被廣原皚
皚均旦暮浩浩壹乾坤凜冽添寒氣蒼茫返混元鵠鷗
潛失影狐貉暗忘魂竹重風旌裏池凝曉鑑昏飛毫玉
兔脫蟠徑素龍蜿蜒陵弱侵庭柳埋青抑砌萱屑瓊誰措

手煉粉若為盆當迴牆頭積迴飈瓦口噴羣飛停啁噪
萬醜掩癥痕窮巷情方憚豪堂勢自溫蕭條孤驛路冷
落古祠閣亂轍分明印雙鷗髣髴蹲何時飄絮定著處
白雲屯酒榼傾浮螳吟牋染戲鴛妙才窺賦象佳興襲
遊園冰鑑清相照瑤枝俯可捫剡舟那遽載郢唱且重
翻啖齧深憐武栖遲酷愛袁韓詩高孰抗謝賦久仍存
肅肅東方騎優優北海樽危樓登郡堞遠目瞰江邛搞
漆踰梁苑中嚴過棘門雄辭端獬豸險句崒崑崙綴韻

金聲協揮毫墨電奔豐年見先兆沴氣已橫吞氛靄銷
中夜球琳冒短垣清光交素魄餘潤浹枯根嘉瑞由嘉
政輿歌莫厭繁

陳次全長春軒

聞道新軒外長春日日花幽人自邁軸佳卉對葩華波
浪千重險煙雲一望賒徒思故園舊短句寄君家

太守孫叔康下車

榮過故里擁朱輪乞得偏城便奉親道路尚驚持斧使

衣冠猶是避驄人下車懇懇唯宣澤
瀕海元元正食貧
草木無情還自喜霜威不見見陽春

別叔康

數年為邑幸焉依德論源源每霽威
瓜代逡巡驚易及
棠陰躑躅忍輕違勸蹤方此從塵路
旅夢多應遶繡衣
回首海城煙霧杳願聞三節召公歸

復用叔康送篇韻和答

岸柳參差影盡橋雲橫日薄旆旌高
贈言有寵榮褒袞

金匱山房集 卷四
制錦無功愧釋刀，苒苒征途行漸遠。
拳拳德表望空勞，仰銜顧遇知何似。
負戴丘山過巨鰲。

京口別叔康

舳艫幸會艤江干，再別情悰豈易安。
坐邑三年師愷悌，歸程累日奉盤桓。
金山寺外波濤晚，鐵甕城頭草木寒。
欲上孤舟又南望，何時重戴觸邪冠。

昨日以事不得陪赴和甫學士之召

藩侯遣事風霆疾，御史高談宇宙寬。
千里幾年成遠別，

一樽相對盡清歡，知無紅袖翻新曲。
想有瑯弓敵暮寒，塵迹鈎牽違燕集。
坐追佳興入毫端。

蒜山酒

蒜山高閣直連雲，酒以山名味獨醇。
玉盞橫飛光照眼，金壘滿泛氣迴春。
幕天欲似劉生頌，卧甕寧為畢卓身。
須信主人如此酒，酣酣千里醉深仁。

和潘倅通甫遊狼山寺三首

次韻

川原浩蕩杳回環，附郭蒼然獨此山。
殿閣栖雲長冉冉，

庵岩度日自閒閒凋零花草三春後
髣髴閭閻十里間
遠邑拘攣聞勝覽馳心閣逐旆旌還

參天雲木覆危岡下瞰叅林釋氏坊
圖按古今詢露井
水分淮浙看風檣清才得景吟還健
浩氣登高力更強
公暇此遊真可樂紛紛何算少年場

譙門南向是狼山車馬朝行意思寬
風散落花紅糝糝
日隨飛蓋翠團團望窮滄海塵寰小
坐逼空岩晝景寒
三伏生秋有餘地無人盡與雍州看

和行海門

畫船輕過綠楊灣
風掠雙旗勢自翻
筆吏濡毫寫新句
厨人鱠玉薦行樽
翩翩舞燕隨檣影
一一驚鷗破水痕
按部從容有佳趣
蒼煙落日肯銷魂

和金沙道中晚景

海鷺飛如織紅花
巧勝裁春光隨水去
野色向人來葦
薄農家露林疎古寺開
扁舟暫踰縮曠望指層臺

謝通甫寄交藤方并氣術圖

仰高誠府日欽欽翰墨飛光忽見臨練氣指迷先六字
餌丹傳訣勝千金仁人錫類多推已塵迹知非早有心
聊咏小詩酬厚賜自慚布鼓若為音

和叔康首夏書懷五首

催得春歸始自安杜鵑啼血應乾晴林日永午陰重
烟海風多曉氣寒壯志經時嗟冉冉蒼顏覽照愧團團
公餘且學田家飲也勝沙場引犢丸

清和氣候爽衣冠海邑稀逢柱礎乾朝拂玉薇琴韻繁

夜開寶匣劍光寒肺腸似石終難變利祿如沙豈易團
行學但知無所負奚為逢射與僚丸

阮履因山固少完陶巾緣酒未嘗乾庭疎紅藥三春過
地近滄溟四月寒堂燕語酣如有訴林蜂衙退自分團
太平吏隱真夷曠安用機心寓臘丸

區區並海作民官手裏魚須竹已乾仕路蹉跎誠計拙
世情熾險為心寒但全冲氣充丹府莫問靈苗采紫團
夏景漸長民事簡靜開黃卷蕪香丸

詩壇老將氣桓桓招集同盟插未乾句險直從天上落
辭清能使座中寒勇揮健筆蛟生角旋劈華箋鳳破團
更愛一時皆善和聲聲嚴鼓中隕丸

次韻和孫世則以詩送別

解印踰旬君已知新詩相寄重相違由來從宦無期定
不得同時受代歸攬轡益嗟賢誼遠異鄉況是故人稀
宜春臺外空回首獨整區區勸翼飛

介亭二十韻呈杭守祖龍圖

列石何年出危亭不日成兩行分磊落八顧壯經營表
裏山川秀朝晡氣象清江湖俱有趣天地豈無情聚井
看綦布重城視帶縈望通魚鼈遠勢壓鳳凰輕鳥背飛
來見雲頭過去平屈盤䟽一逕浩蕩接雙盈難秘神僊
境茲逢賞識精元侯挾餘裕樂俗沸休聲物外籠真槩
胸中愜雅誠有時陵翠靄極暮聳紅旌九萬鵬程近三
千客履榮樽罍卑北海篇詠小宣城峴首空多嗜蓬萊
謾自評古今為絕觀風月快平生覽景聰明曠書銘意

思宏優游傲主袞端正等權衡愷悌均吾衆中和得所
行此心非苟豫奚愧介之名

和陳和叔內翰憶梅花因手植數本又命畫工作
生枝于屏間

翰林清興滿江鄉尤憶梅花趲臈芳已寫幽屏外桃李
更攄蓀思壓班揚自期造化加先意豈待嬋娟借末光
幸預樽前此佳賞還祈手植早飄香

叢山堂

經營新自翰林公勢壓南譙氣象雄四顧高明千里近
一團蒼翠萬山叢琅邪路入青林轉豐樂泉疏白石空
唐相若能前此制當時應不暇懷嵩

次韻答和叔見招茅庵奕碁

豈弟移風州事稀何妨退食自委蛇新陽來復茅庵暖
喜奉高篇促對碁

和同遊溪北竹園

追攀却憶謫仙詩曾向東城倒接羅此日清遊非痛飲

一時幽趣有枯槩鳥聲似逐新陽轉竹色如便晚景遲
勝槩佳辰莫輕寘看看召節動歸期

詠雪

密雪乘新臘凝陰混太清洒空寒送色著物靜無聲舞
恨庭除隘鋪宜原野平枯株資點綴朽壤藉包并價踴
村鑪酒愁添古塞兵巧裁梁苑賦幽動剡溪情可慶豐
年兆何虞豔氣生行看窮歲籥坐喜覆山城遠祖篇章
在元侯德政成與民為福外閭闔一心傾

詠雪霽月夜見簡

百尺城頭雪月間
城樓更向碧霄干
優游野步來危坐
髣髴仙蹤在廣寒
幽致獨為中夜賞
清輝分與近隣看
瑤臺十二傳佳句
瀟洒高情豈易闌

和雪前數刻迎郊赦口占

君恩無遠近千里到山城
人意方均喜天心為降靈
旗增德色簫鼓變和聲
盛際千年會誰將史冊評

明月庵

南譙郡古牙城壯城上樓臺屹相向晴天落日碧山橫
登覽依稀在屏障從容北步上茅庵圓如氊帳幽如岩
眼前竹石皆自得物外氣象容誰探公餘時來興清切
幅巾道服雙筇節廓然遺照坐可忘更向庵心畫明月
和閒步城上率遊城南

城南古木未全凋溪裏寒魚正可撿紅旆追攀真得趣
塵懷萬斛等閒消

和夜登東閣

夜初乘興上城頭
白玉蟾蜍碧玉天
爽曠襟懷誰得似
謫仙身世豈非前

辭勸飲

主意固慙慙
須辭酒味醇
願為投轄客
不作吐茵人

雪後遊琅邪山聯句

南溪約幽尋
西嶺極遐觀

繹

初陽色朦朧
殘雪光汗漫

驤

相望樓殿間
宛在雲霄半

繹

泉聲減琤淙
山勢欲飛

竄

驤

岩寒雨花霏
谷暖煙絮亂

繹

幽鳥度喬林
驚猿折

枯幹

驤

決決漲溪流輝輝披野岸

繹

蘭芽吐尚微冰乳

凝未泮佛屋對峯尖禪庵倚崖斷

驤

軒窓愛虛豁赤白從

漫漶行敲玉玲琅松溜珠璀璨

繹

寧將瓊礫分未省蘭

蒿判行幽兔迹深鵬遠鷗翅緩登宜阮孚屐隱稱嵇康鍛

驤

結遊賢躅多鑱石清詩爛極目窮躋攀投隙違羈絆

榮觀太帝書暫憇飛仙館

繹

石立翠屏張霞收丹錦散

硯坐客爐擁負暄僧衲換選勝唯務得陟危寧復憚

驤

誰乘泛海槎直欲傍銀漢

繹

况有凌雲才何妨舉風翰

驤

景多苦冥搜歡解慳佳玩繹乃情慰懸想昔傳非謾

譚

驤

題輿真莫儔刻燭愧非伴

繹

玉局共藏機瑤琴越

捺縵

驤

謠諺喜年豐評文同月旦

繹

大筆肆滂葩小巫

成泚汗

驤

造適寓林泉貪縈任冰炭

繹

通侏去末禮從

容占竒段

驤

促節歌更新啣杯酌無筭

繹

敢謂良會難

堪為畫圖看

驤

感慨非獨醒賡酬每三嘆

繹

翔步雖異

途清懽歸一貫

驤

洒落似青冥拘攣豈狴犴絕頂所見

稀清狂茲興罕

繹

立飫謝珍鮮行庖後樵爨唯恐三節

來難留千騎驛

驛

何時金輦客重親
玉皇案迴首念斯

遊馳精杏無畔

和會峯亭

千峰環聚翠模糊
欲卜為鄰豈易圖
且使縑綃盡將去
披觀未必後仙都

和喜奉御札改元元豐口號

改號泥封下碧空
天光遠燭郡城中
禁林舊德承宣重
預向偏州致歲豐

又和

元豐嘉號改明年萬里江山色愈鮮侍從舊臣承紫詔
拜恩如在御床前

幽谷迴口占呈和叔內翰

五騎行歌五馬前亂雲輕點亂峯巔此時佳興此中醉
一闋清詩一玉船

和山郡早起

牙城曉色動旌旗筆吏來抄枕上詩溪柳山梅應闔覺

先春芳意肯遲遲

鈴齋書几燭花消簾外寒霜曉尚飄却憶夜來行樂處
煙村雲塢聽農謠

和臘日初晴會同僚射飲投壺

曉風吹雨作晴雲臘日山城已似春林木欣欣初有趣
郡齋皦皦迴無塵祭軍雅戲齊酣戰矍圃環觀密布鱗
此樂得為知所自天將豐歲與滁人

和雪意

凍雲慘淡連吳野，舞雪繽紛鬪楚宮。
郡守華堂方置酒，山翁鶴馭忽乘風。
未看夜月光輝助，已喜寒梅氣息通。
欲把新詩解嗟嘆，強隨高韻愧無功。

坐中聞擊鼓毆儺聲戲聯數韻

故歲妖癘逐新春，祥慶多

繹

旌旗催出獵，簫鼓引毆儺。

驤

翫翫將軍至，鬚髯羅刹過。

憲

丹書神按籍，白晝士揮

戈

繹

革面徒為異，清門豈有魔。

驤

成功在搜厭，正氣滿

天衢

憲

行縣坐野館食次得所貺手墨兼惠雀鮓兔饌因
以鄙句馳謝

清江雀鮓冠江南置兔鮮腴美可餐旅食尋常疑指動
鈴齋方丈忽分甘行庖飪餽珍非八下筋矜持嗅必三
知味便知公意重屬饜寧以小人貪

和郡齋即事

郡齋鈴索靜無聲風引香煙入翠屏綦勝文枰子收玉
詩成汗簡竹書青治民不害為高卧對客何嘗銜獨醒

他日鳳凰池上樂也應難忘養生經

和歲除

莫惜年華此夕凋漫漫將旦即春朝
綈帷指刻更殘律析木循環復建杓
玉琰椒花投曉薦銀檠蠟炬隔年消
祇應幽谷知時早已欲飛遷翠木喬

元豐改元元日登行春閣

夜盡銅壺漏朝生玉律春日稱元最重年
與號俱新郡閣晴光早山城喜氣均
椒觴初獻壽仙木已書神鷹隼

心難止龍蛇蟄欲神溪水仍泛泛園柳自欣欣物意幡然作人情豈不倫區區添甲子斂拙任洪鈞

和歲節見招城上閒步

山頭宿靄微微見木末春風細細生動植逢時俱有意乾坤造物本無情拘攣未易逃繩檢休暇何方解組纓所幸得吟瀟洒句又隨旌旆上牙城

和天慶觀醮宿

壁月團團徹曉明琳宮深邃寂無聲傳聞此夜曾齋宿

讀著新詩骨也清

和因觀罩魚斫鱠

一丈深溪一丈魚不論高價只愁無携來縷作霜盤鱠
美玉紛紛得所沽

昔詠洗刀魚眼紅少陵才思摩秋空今朝大嚼有餘興
佳句復出文章翁

和野步

追隨仙舫南溪去欲向春波擲釣竿無奈東風攬清興

却吹晴靄作溪寒

和柳眼

覘煙窺月早于梅不待東風著意催應為朱輪屢回顧
未春先向道傍開

小檜毬

裁芳剪嫩巧間關屈葉蟠枝不可攀拋擲似遺春女戲
一團輕翠在朱欄

和見招


仙館憇旌輿清篇手自書撥煩雖欲往俗吏得休無

竹徑

紫紆一道貫檀欒入翠穿斜步履慳俗客也應無暇到
不煩春筍為遮欄

和寶嚴閣

佛宮高閣踞城東巾履閒來面碧峰風却雲頭護清景
春催柳眼作先容溪傍幾簇紅梢露竹外誰家翠幕重
玉局棊收歸路近昏鴉驚潰一聲鍾



錢塘集卷四